

Հրաւիրւած են լինում նաև վերջինիս մօտիկ ազգականներից մի քանիսը. սովորական հարց ու բարևից յետոյ աղջկայ հայրը հարց է տալիս նշանախօսներին. —

— Ո՞ւր էք էկել մեր տունը:

— Ձեր սէրն է բերել, — պատասխանում է քահանան:

— Էկել էք ինչ անէք:

— Էկել ենք, որ ձեր բաղիցը մի ծաղիկ քաղենք:

— Բարի է, մենք էլ կամենում ենք. — պատասխանում

է աղջկայ հայրը. դրա վրայ տղայի հայրը համբուրում է նրա ձեռքը, այդ ժամանակ հաւաքւածները շնորհաւորում են՝ «Աստուած շնորհաւոր անէ, բաղաւար ըլին, մի բարձի ծերանան» ասելով: Այնուհետև տղայի հայրը գնում է մօտակայ սենեակը, ուր հարսնացուն է լինում, այդտեղ նա համբուրում է աղջկայ երեսն ու ճակատը և տալիս է այն թաշկինակը, որի մի ծայրին կապւած է լինում մատանին, իսկ միւս ծայրին 10—20 թուման փողը. ապա վերադառնում է առաջւայ սենեակը, ուր քահանան մի քանի սովորական խօսքերից յետոյ օրհնում է, դրա վրայ նորից շնորհաւորում են երկու կողմին, յետոյ քաղցրաւենիք են բաժանում և թէյ խմում, որին յաջորդում է ընթրիքը:

Նւէրնեք: Նշանւած ժամանակամիջոցում ամեն մի նշանաւոր ասն օրերին՝ ինչպէս Բարեկենդանին, Ծաղկազարդին, Զատիկին, Համբարձմանը, Վարդավառին երկու կողմից — աղջկայ և տղայի տներից, միմեանց փոխադարձաբար ընծաներ են ուղարկում, որ բաղկացած է լինում անուշեղէններից՝ գաթայ, հալւայ և զանազան ընծաներ՝ օղի, ներկած ձու, կօշիկ, գլխի շոր, գուլպաներ, մետաքսէ թաշկինակներ, ընկօլզ, չոր մրգեղէն և այլն:

Այրիի նշանադրութիւնը: Այրի կինը եթէ որդիներ չունի, վերադառնում է հօրանց տուն և ամուսնանում, իսկ եթէ որդիներ ունի, մնում է սկեսրանց տանը: Ընդհանրապէս այրի կանանց նշանադրութեան ու պսակադրութեան հանդէսները շատ պարզ են լինում: Այրի կնոջը նշան գնելիս,